

DISPUTATIO SOLENNIS

24.

De

SINGVLTV:

*In inclyta Argentoratensium Universitate
proposita*

à

MELCHIORE SEBIZIO,
MEDICINAE DOCTORE ET PRO-
FESSORE, COMITE PALATINO
Cæsareo, & Reipubl.
Archiatro:

RESPONDENTE

MARCO MAPPO Argentoratensi

22. Mens. Jul.



ARGENTORATI,
Typis FRIDERICI SPOOR.

ANNO M. DC. LIX.

GRATIOSO
LIBERALIS LEGATI
SCHENCKBECHERIANI
DIRIBITORUM,
*Virorum, Nobilitate, Amplitudine, Reverenda
Dignitate, Prudentia, Experientia, & Consilio
Clarissimorum*
COLLEGIO,

- DN. DANIELI WENCKERO, Reipub. Argentor. Quindecim-
Viro gravissimo, Stipendii Schenckbecheriani Ephoro dignissimo.
- DN. NICOLAO JUNTÆ, Reipubl. hujus Archi- } Geminis
grammateo meritissimo. } h.t. dicti
- DN. BALTHASARI FRIDERICO SALZMAN- } Stipendii
NO, S.S. Theolog. Licentiato. summi Argentor. Tem- } Directori-
pli Pastori vigilantissimo. } bus.
- DN. MELCHIORI SEBIZIO, Doctori & Professori Medicinæ
ordinario, Comiti Palatino Cæsareo, Capituli Thomani Præposito,
Reipubl. hujus Archiatro, & h.t. Facultatis Medicæ Decano:
- DN. MELCHIORI GREINERO, Vtriusque Juris Doctori &
Præctico consultissimo.
- DN. FRIDERICO à GOTTESHEIM, Quæsturæ ad D. Matthæi
& Nicolai in Undis Curatori fidelissimo:
- DN. JOHANNI CASPARO BERNEGGERO, Reipubl. à Se-
cretis & Regestorum cura Viro solertissimo:
- DN. JOHANNI JOACHIMO FRANZ Colleg. Quindecim-
viralis Secretario laudatissimo:


Dominis Meccœnatibus

*Me, meaq; studia commendaturus
Disputationem hanc Solennem
humili observantia
consecro*

MARCUS MAPPUS Arg.



Thesis I.



Singultus πᾶθος est frequentissimum: & est in quibusdam affectibus signum malum: imò interdum mortis prodromus: verbi gratia, in peste, febribus malignis, dysenteria, viscerum inflammatione, colica passione, aliis. Accidit autem non solum agris, sed etiā sanis corporibus, quorum tamen singultus magni momenti non est, quia vel sponte evanescit, vel faciliè sedatur.

II. *Dignus proinde morbosus est singultus, cuius nomenclaturæ, significata, definitio, pars affecta, differentia, causæ, signa diagnostica & prognostica, deniq; etiam curatio cognoscantur.*

III. *NOMENCLATURAS quod attinet, vocatur affectus iste à Græcis λύγξ, λυγμός, &, quemadmodum Galenus notat comm. 4. in libr. Hipp. de morb. acut. §. 69. λύγγος: nimirum à verbo λύζω, quod est singultio.*

Nomina

IV. *A latinis appellatur singultus. A Germanis der Klux. Alii dicunt der Nosch / das Niren / der Hetsch. Communis cum hominibus est equis, qui ipsi quoq; singultiunt, & ut homines etiam tussunt.*

V. *Observandum autem, singultum tres habere significationes: unam propriam, duas improprias.*

Significationes.

VI. *Propria est, qua de impræsentiarum nobis sermo erit. Impropria prior est illa, qua apud nobilem illum rei rustica scriptorem, Columellam, lib. 8. c. 5. legitur, tribuiturq; gallinis, cum ova paritura sunt. Nam ante partum*

crebros edere singultus solent: quod nostri populares das Gas-
ren nuncupant: Græci γαστήριον & γαστήριον dicunt.

VII. Impropria posterior est, quæ apud eundem Co-
lumellam extat. Notat autem singultus illam gallina vo-
cem, quæ glôcitatio nuncupatur, & quæ pullos vel ad se, vel
ad pabulum illeëtat. Nostrates gluckern wie eine Hanne
nominant. Vnde & Gallinae glôcientes Gluckhannen di-
cuntur.

VIII. Præter has duas improprias singultus significa-
tiones reperitur & tertia apud Horatium, quæ suspirium,
das Seuffzen / sonat: l. 3. Carm. od. 27. Sic enim ille ad
Galatæam navigaturam.

Vxor invicti Jovis esse nescis?

Mitte singultus: benè ferre magnam.

Disce fortunam: tua sectus orbis

Nomina ducet.

IX. Quidam illum puerorum adhuc flentium, aut fle-
re desinentium motum, quem vulgò das Aufstossen / oder
das Psuffzen vocant, pro singultu habent, ut Gordonius
in Lilio Med. part. 5. c. 7. Sed errant: quoniam motus iste & sin-
gultus ratione cause, & subjecti, unde ambo prodeunt, inter
se differunt. Singultus enim juxta Hippocratem aphor. 39.
sect. 6. causas in genere habet duas, πληρωσιν & κένωσιν, reple-
tionem & inanitionem: ejusq; subjectum est ventriculus: iste
verò puerulorum motus in & post fletum in ventriculo suam
sedem non habet: sed in partibus respirationi dicatis, in qui-
bus, & præcipuè in pulmonibus, spiritus retinetur. Nam
præ ira & lacrymis liberè non respirant. Spiritus igitur, si
cohibeatur, acervatim erumpere nititur, & motum illum
nominatum efficit: qui tamen verus singultus non est: quem-
admodum nec illa respiratio, quæ ab Hippocrate aphor. 68.
sect. 4. πνεῦμα προσκόπτον, spiritus offendens nuncupatur, hoc
est, sicut Galenus in comment. illum interpretatur, respi-
ratio

ratio subsistens, & in sui medio interrupta: qualis in plorabundis infantibus observatur.

X. DEFINITVR autem singultus ab omnibus authoribus, Græcis, Arabibus, & Latinis, motus, quo ventriculus conatur expellere ea, quæ suis impacta sunt tunicis. De quo tamen posteriori membro quid sentiendum sit, th. 25. explicabitur.

XI. Hinc apparet, singultum symptoma esse, & quidem præcipuè facultatis ventriculi expultricis: quod in nostra potestate & arbitrio situm non est. Non enim singultire possumus, cum volumus: nec singultum sedare, quando nobis placuerit.

XII. Verùm quæri solet, qualisnam sit motus? Respondet Galenus lib. 2. de caus. sympt. c. 1. motum esse πλῆμμελῆ, illegitimum & vitiosum: & quidem ex illo ejus genere, qui opus Naturæ appellatur, sed à quadam morbosa causa ad movendum coacta.

XIII. Nam Galenus loco citato tria vitiosorum motuum genera proponit. Primum jam est indicatum, & est eorum motuum, qui opera quidem Naturæ sunt, sed ab aliqua morbosa causa irritata: ut sternutatio, tussis, oscitatio, pandiculatio & singultus. Intelligit autem Galenus per Naturam, quemadmodum seipsum interpretatur, πᾶσαν δυνάμιν τὴν διοικῶσαν τὸ ζῶον, omnem facultatem, quæ animal gubernat, sive à voluntatis nostræ pendeat arbitrio, sive non. Totum quippe animalium, vitalium & naturalium facultatum genus, quo animal regitur & conservatur, à causis præter naturam, quæ animal ledunt atq; corrumpunt, distinguitur: quoniam illæ animal conservant sanum: hæ verò id ipsum destrunt & labefaciunt.

XIV. Secundum genus illorum est motuum, qui morbosos sequuntur affectus, Naturam ad ipsorum generationem nihil conferente: ut palpitatio & convulsio.

XV. Tertium illorum, quibus morbus & Natura simul operantur: ut motus *παρὰ φύσιν*, torpidi, & alii, in quibus Natura quidem agit, cum motum excitat, verum morbus efficit, ut sit torpidus. Hujus generis est *παράλυσις*, quae nondum est perfecta & consummata: quoniam in ea Natura membra movet, sed debiliter, idque propter morbum hanc ipsam impedientem. Tremor quoque hoc in symptomatum genere continetur. Facultas enim in eo membrum attollit, sed morbus ad inferiora deprimit.

XVI. Hic autem non immerito quaeritur, cum Galenus lococitato singultum vitiosis & illegitimis motibus, & consequenter etiam symptomatibus, annumeret, cur dicat, illum opus Naturae esse? Respondetur dupliciter. I. quia ventriculus duos tantum motus naturales habet, sui nimirum dilatationem & constrictionem circa assumptum alimentum. Lieet autem idem etiam in singultu dilatetur primum, postea constringatur, ut excutiat, quod est inimicum, tamen dilatatio ista atque constrictione est molesta, & quodammodo violenta. Quae vero fit circa alimentum, blanda est, & propterea grata atque jucunda. II. quia tametsi singultus dici possit motus legitimus ratione facultatis expultricis, tanquam causae efficientis, quae est naturalissima, ea tamen ratione vitiosus & illegitimus à Galeno statuitur, quoniam proficiscitur à re ventriculo adversa, quae illum ad singultum irritat & stimulat.

XVII. Quaeritur secundo, an singultus pro genere possit habere *σπασμὸν*, convulsionem? Affirmantem tueri videtur Hippocrates aphor. 39. sect. 6. ubi scriptum reliquit, singultum causas habere cum convulsione communes. Sed Galenus l. 3. de sympt. caus. c. 2. & comm. 6. aphor. 39. docet, singultum quasi quendam motum convulsorium vocari posse, propriè tamen & accuratè loquendo convulsionem non esse: è quòd convulsio solis insit musculis; ventriculus autem, & orificium ejus, quod *σφύραχος*, alibi ex veterum sententia etià *καρδια*

*Definitio. Spasmi.
Musculorum depre-
vati. Motus. Spasmi prin-
cipium. Constrictio
preter voluntat.
a facultate ex-
pultriciis partibus
nervorum a re
molesta irrita-
tione, quae in
molem sibi jun-
ctam in consensu
trahit, et ad hunc
motum incitat.*

Slav appellat, in musculorum albo minimè contineantur. Cui & rationi & ista addi potest, quoniam in omni singultu expul-
trix virtus conatur extrudere id, quod est noxium, h.e.
quod vel gravat, vel premit, vel qualitate aliqua, mani-
festa, aut occulta, ventriculum ad excernendum laceffit.

XVIII. Nam quando ventriculus sentit aliquid sibi
inesse, quod detrimentosum est, primum se dilatat: dein-
de sese constringit, suaq; facultate expultrice ejicere illud
studet, quod detrimentosum sibi Natura instinctu percipit.
In spasmò autem nulla fit dilatatio, nulla etiam Expulsio.
Itaq; Galenus comm. 6. aphor. 39. concedit quidem, ut
singultus *σπασμός* vocetur. Melius autem esse dicit, non
vocare *σπασμόν*, sed quendam motum ejus generis, cujus
est vomitus: intensiorem tamen & vehementiorem.

XIX. Quæritur tertio, an & expultriciis, & re-
tentricis facultatis symptomata in singultu concurrant?
Respondetur, concurrere symptoma expultriciis primario:
retentricis secundo. Galenus enim l. 3. de sympt. caus.
c. 2. hanc adfert rationem, quoniam in singultu neutra
facultas probe & ordinario modo suo munere fungitur.
Non expultrix, quia singultus, ut modo dictum, motus
quidam est vitiosus, utpote convulsorius, dum ventriculus
audet propulsare quod est alienum. Non retentrix, quoni-
am ventriculus, quando singultit, *μολὴν*, *καὶ ὁ κατὰ φύσιν*
cibos complectitur.

XX. Quæritur quarto, quomodo vomitus & singul-
tus inter se convenient, & quomodo differant? Responde-
tur, convenire primum, quia uterq; est motus quidam
Ventriculi. Deinde, quia uterq; fit a facultate ventricu-
li expultrice. Tertio, quia in utroq; ventriculus primum
se dilatat atq; extendit, postea verò sese valide constringit
& coarctat, ut *τὸ ἀλλότριον* excutiat. Differre autem
juxta Galenum lib. 3. de sympt. caus. c. 2. quoniam per vo-
mitum ea rejiciuntur, quæ in ventriculi cavitate sita sunt:

in singultu verò, quæ tunicis, seu fibris ventriculi penitus
& altius sunt impacta. Deinde, quia secundum eundem
Galenum comm. 6. aphor. 39. in singultu motus est for-
tior, intensior, & vehementior: in vomitu autem remis-
sior. Rationem statim subjungit: quoniam in vomitu, uti
modo dictum, excernuntur ea, quæ in ventriculi capaci-
tate existunt: in singultu verò illa, quæ firmitus sunt ἰσχυρὰ
infixa. Facilius autem priora quàm hæc ejiciuntur: quoniam
illa sunt soluta, & libera, hæc verò valide impressa. Inau-
dire se autem monet per τὸν σμάχος non solum eum, qui κούλος
σμάχος, h. e. ventriculus, ciborum receptaculum, & conco-
ctionis prima, χυλώσιος scil. ἐργαστήριον appellatur, sed etiam illius
orificium, quod animalis appetentia sedes est, & κασιδιά à pri-
scis Medicina proceribus fuit cognominatum.

XXI. Avicenna lib. 3. can. fen. 13. tract. 5. c. 19. po-
sterius discrimen non admittit, sed vult, singultum motum ef-
se vomitu leviolem & debiliorem; eò quòd singultus multa-
ries precedat, & vomitus sequatur. Addit insuper, non in
omni vomitu ejici illa, quæ sunt in cavitatem ventriculi effu-
sa, sed quandoq; etiam quæ substantia ejus sunt impressa. I-
tem, quia videmus, in singultu nihil expelli: expelli autem
in vomitu. At in quo nihil expellitur, non necessario fortius
est eo, in quo semper expellitur aliquid. Deniq; quia singul-
tus excitari potest à levi causa, v. g. à grano piperis pulverisa-
ti. Si quis enim, inquit Galenus comm. 6. aphor. 39. il-
lud deglutierit, vel per se solum, vel cum alio aliquo liquore, at
postea vinum aqua calida temperatum biberit, statim singul-
tiet: calore quidem potus piper ad interiora vehente,
ejus verò acrimonia ventriculum molestante. Ex quo
evenit, ut ventriculus singultu, motu scil. violentiore, rem in-
festantem profligare conetur.

XXII. Nos persuasum habemus, quòd ad huius qua-
stionis decisionem distinctione opus sit, & comparatio in ima-
specie

specie instituenda. Etenim si causa singultus sit copiosa, vel etiam maligna satis, & membranæ ventriculi firmitus inhaereat, adeo ut ventriculum irriteret & stimulet: vomitus autem & causa levior sit & parca, tunc singultus vehementior motus est vomitione. At si fiat contrarium, rationi consonum est, vomitum vehementia superare singultum.

XXIII. Singultus præterea sanorum mitior & remissior est, quam agrotantium. Quanto enim cum labore ac conatu vomitio fiat in cholera morbo, in nephritide, in peste, & in colica atq; iliaca passione, satis superq; illi experiuntur, qui hisce affectibus infestantur.

XXIV. Vidimus tamen etiam agros quosdam, qui multis diebus horrendum in modum singultiebant: adeo ut neq; placidum capere somnum, neq; quicquam cibi aut assumere, aut assumptum retinere potuerint: ita defatigati & viribus exhausti, ut fatis tandem concesserint. Distinguenda igitur hic est causæ quantitas, qualitas, & situs.

XXV. Quæritur quintò, an in omni singultu causa ejus necessario hæreat in tunicis, vel fibris tunicarum ventriculi sit imbibita? Respondetur, rem ita se habere vix plerumq;: at non semper & necessario. Exemplum nobis porrigit Fernelius l. 6. παθολ. c. 3. ubi refert, quendam tres continuos menses singultu vexatum nullis consuetis remediis antè potuisse expediri, quam costæ extremum, quod tunc primum deprehensum est contorqueri, altiusq; in ventriculum, nullo sensu doloris, insigi, blandè & molliter erectum sit. Confestim enim singultum affligere desisse: qui tamen repetierit, quoties costam denuò incurvescere contigisset. Subdit etiam, se dein in non paucis eandem singultus causam agnovisse. Nos quoq; comperimus quotidie, quòd qui vel panem durum & siccum devorârunt, vel ventriculum nimia cibi copia onerârunt, singultire soleant: cum tamen causa singultus aut non in ipso ventriculo, sed extra

B

illum

illum consistat : aut in ipso quidem hæreat , membranæ ejus
neutiquam impacta , verum in illius duntaxat cavitate,
aut orificio delitescat. Item, quando aura quædam maligna
in febrrib. petechialibus & pestilentialibus in illud est effusa.

XXVI. Quæritur sexto , quomodo singultus & vau-
tia, nausea, inter se differant ? Sciendum hîc, quod nausea
vocabulum accipiatur generaliter, & propriè ac specialiter.
Generaliter sumptum significat cibi fastidium, *Estel / Mafz-
leidigkeit / Unlust des Magens.* Aurelianus horrorem
ciborum vocat. Specialiter usurpatum hujus est loci, estq;
nil aliud , quàm inane vomendi desiderium, quo nihil eji-
citur. Sæpe tamen sponte nullog; conatu pellucida aqua ab
ore profluit. Germani vitium istud den Unwillen des
Magens appellant : quod plerung; vomitum præcedit.
Differt autem à singultu I. quia in illa, non, ut in singul-
tu, ventriculus dilatatur & constringitur. II. quia non
sicut in singultu fit cum sonitu. III. quia materia ejus,
non ut in singultu ventriculi substantiæ est impacta.

XXVII. Quæritur septimò, quando singultus, quan-
do vomitus, quando nausea fiat ? Singultus fit, cum cau-
sa corpori ventriculi est inserta. Vomitus, quando solu-
ta est, & in cavitate ventriculi hæret, si scil. ventriculus
sat habeat virium, ut se contrahere versus orificium suum
valeat, & quæ in fundo jacent, per superiora evacuare.
Nausea, quando vel propter stomachi imbecillitatem, vel pro-
pter materiæ lentorem, crassitiem & contumaciam vomitio
fieri nequit. Tunc manet quidem voluntas & conatus e-
vomendi, sed planè irritus atq; inanis.

XXVIII. Quæritur octavò, an singultus rectè eru-
ctatio nominetur ? Galenus comm. 2. in l. 6. epid. §. 32.
scribit, singultum à nonnullis vocatum fuisse *πεύγι*, quæ
aliàs dici solet *εργυή*, & *ορευρυός*, eructatio. Addit autem,
hanc vocem usurpatam & descriptam esse variis modis. A-

*Hios enim flatulenti spiritus expulsionēs, undecunq̃, & ut-
cunq̃ factas, eructationes nuncupasse: secundum quorum
sententiam tussis, sternutatio, crepitus ventris, spiritus dif-
flationes per omne corpus, etiam singultum, eructationes no-
minari queunt. Quosdam omnem excretionem, non spi-
ritus modò, sed etiam aliquorum humorum eructationem
esse existimasse: suamq̃ opinionem Poëte confirmasse autho-
ritate, qui etiam mari eructationem tribuebat.*

*Sed Galenus subjungit, hanc significationem vitiosam
esse. Nam si quis vocabula raro & poëtico modo usurpata
tanquam propria interpretari vellet, certè etiam omnia,
quæ clarè & perspicuè dicta sunt, pervertere posset.*

*XXIX. Nos singultum nullo modo eructationem sta-
tuere possumus: quoniam eructatio propriè flatus est, &
halitus à ventriculo ascendentis per os emissio. Nam quan-
do halitus ad summitatem gula pervenerunt, tunc propter lo-
ci angustiam liberè exire nequeunt: sed condensantur, &
conglobantur, ut vi quadam erumpant, suaq̃ eruptione &
elisione, sive expressione sonum edant, nunc majorem, nunc
minorem, pro ut copiosi, aut pauci, crassi aut tenues exti-
terint, & pro ut etiam majori, vel minori conatu fuerint
extrusi. Quæ de singultu dici non possunt.*

*XXX. PARS AFFECTA in singultu est Ventriculus, Pars affe-
ut notum omnibus. Eius enim facultas expultrix sollicita-
ta est ad excretionem illius, quod infestat & molestat.*

*XXXI. Sed secundum quam partem affectus sit, qua-
ritur. Galenus l. 5. de locis aff. c. 6. & comm. 6. aphor.
39. docet, singultum esse proprium oris ventriculi affectum.
At l. 2. de sympt. caus. c. 6. scribit, singultum totius ven-
triculi affectum esse. Vtrumq̃, defendi potest, & distin-
guatur.*

*XXXII. Distinguendum autem inter affectum ipsum,
quem statuit Galenus non quidem convulsionem propriè di-*

Etiam esse, attamen motum quendam convulsorium, comit.
4. in lib. de morb. acut. §. 69. & l. 3. de symptom. caus. c.
2. & inter illius causam.

XXXIII. Causa consistere potest modò in orificio, mo-
dò in fundo, modò in orificio & in fundo simul. Ipsum
verò symptoma, & motus ipse, qui in singultu accidit, toti
ventriculo adscribendus videtur.

XXXIV. Etenim quando ventriculus à sua causa ir-
ritatur, tunc primùm se dilatat, mox collectis viribus se con-
stringit & contrahit: hacq; corporis sui contractione nunc
aliquid é tunicis exprimit, nunc etiam sine contractionis
frustratur. Eademq; hîc est ratio, quæ est in aliarum
partium excretionem. Cerebrum enim stimulatum per ster-
nutationem in sui contractione excutit ea, quæ sibi sunt
contraria: pulmo & thorax contrahuntur in tussi: uterus
in partu: vesica urinaria in mictione: intestina in de-
jectione fecum: cor in palpitatione: ita ventriculus in
singultu.

XXXV. Clarissimus Mercurialis l. 3. prax. c. 4. ait,
causam quidem singultus posse esse aliquando in ipso ventricu-
lo: aliquando in orificio ejus: sed motum istum convulsorium,
h. e. singultum secundum suam naturam & essentiam conside-
ratum tantùm orificio acceptum ferendum esse. Id enim, cùm
sit exquisiti sensus, primùm sentit, primùmq; ad expulsionem
rei noxiæ movetur.

XXXVI. Verùm, cùm ipsemet ibidem concedat, ven-
triculum in singultu se primùm dilatare, postea constri-
gere, & hac constrictione, sive contractione efficere, ut
quod negotium sibi faceffit, eliminetur, necesse est, ut e-
tiam concedat, totum ventriculum excretionis causam
esse.

XXXVII. Dominus Platerus persuasum habuit, sin-
gultum septo transverso esse adscribendum. Sed li-
cet

et septum istud ventriculo vicinum sit, & sapè una cum ventriculo moveatur, tamen non propterea singultus subjectum dici debet. Aliàs enim & vomitus foret receptaculum. Imò musculi quoq; thoracici, venterq; imus illius subjectum essent: quoniam hæ omnes partes in singultu, sicut & in tussi, & sternutamento moventur.

XXXVIII. Ibi autem istud ὑποδοχὴς ponendum est, ubi primario motus incipit, & ubi causa jacet, quæ ventriculum offendit. At & motus in ventriculo inchoat πρῶτος, & causa in ventriculo sita est. Ideòq; in ventriculo, non alibi, singultus subjectum statuendum.

XXXIX. Qui asserunt, singultum fieri in gula, à veritatis tramite aberrant. Gula namq;, sive œsophagus, duas solummodo publicas exercet actiones, attractionem alimentorum per fibras rectas, quæ sunt internæ illius membranae insertæ: & transmissionem eorum ad ventriculum per fibras transversas, quæ insitæ tunicæ ejus externæ, quæ carnosæ est.

XL. At obiiciunt aliqui Galeni auctoritatem. Is enim l. 2. de caus. sympt. c. 6. affirmat, singultum fieri in stomacho. Verùm per σῶμαχον, non, ut l. 6. us. part. c. 6. gulam intelligit, sed ventriculum. Habet enim vox σῶμαχας apud Medicos quintuplicem significationem. I. sumitur pro gula, sive œsophago, qui à Lactantio fistula cibaria dicitur, quia per illum, tanquam per canalem, tubum, aut siphonem, esculenta & potulenta ad ventriculum deferuntur: teste Galeno l. 13. meth. med. c. 17. II. καλαχενσιῶς, quemadmodum cap. 1. l. de cur. rat. per S. M. monet, pro orificio ventriculi sinistro. III. pro Ventriculo, primæ concoctionis officina: quæ significatio crebrò admodum apud Dioscoridem & Plinium occurrit: quando de medicamentis & alimentis stomachicis verba faciunt, & quadam eorum εὐσῶμαχα, quadam κακὸςῶμαχα nominant; quorum illa ventriculum ju-

vant & oblectant : hac eidem nocent & ingrata sunt. Vocantur & εἰσόμαχοι & κακόςμαχοι illi, quorum ventriculus bene, vel male est dispositus. Estq; hac tertia stomachi significatio etiam apud Poëtas usitata. Vnde Horatius l. 2. serm. satyr. 2. dicit, jejunum stomachum rarè vulgaria temnere : & paulò post, latrantem stomachum panem cum sale manducatum benè lenire. IV. in genere pro collo instar alicuius isthmi angusti cuiusvis cavitati proposito : authore Galeno l. 4. de us. part. c. 1. Hac ratione cervix uteri & vesica secundum Galeni mentem stomachus dici potest. V. adhuc generalius pro quovis cuiusvis cavi corporis orificio. Quae significatio apud Hippocratem passim in libro de superfoet. extat, ubi orificium uteri citra additionem alicuius subiecti σίμαχον appellat : quod aliàs tamen, utpote aphor. 46. §1. & §4. sect. 5. & alibi τὸν ὑστέρον vocare consuevit.

Differen-
tia.

XLI. DIFFERENTIA singultus varia sunt. Varius namq; est ratione causarum, quas mox enarrabimus. Est alius vehemens, validus atq; intensus, qui laboranti valde molestus : alius levior ac remissior, qui illi tantum negotii non facit. Durat alius diutius, brevius alius. Iste est idiopatheticus, in ventriculo natus, ob causam, quae inibi collecta : ille sympatheticus, cuius causa aliunde ad ventriculum pervenit. Est deniq; alius criticus, qui vel per vomitum futuram portendit : alius merè symptomaticus, qui nihil boni praesagit : qualis est, qui in colica & iliaca passione, & in febribus, quas Hippocrates l. de vict. rat. in morb. acut. πυρετὸς λυγρόσας vocat, animadvertitur. Galenus comm. 4. §. 69. addit, fuisse febricitantes quosdam, qui in singultu rodentem & acerrimum vomuerint humorem, & ab hoc symptomate fuerint liberati. Verum eiusc medi febrim nequaquam λυγρόσιν, singultuosam appellari, sed eam solummodo singultuosa febris nomine venire, in qua singultus longius perseverat : aut etiam per totum

totum morbi decursum unà cum febre exacerbatur. Hæc febres singultuosas Hippocrates ibidem solvi asserit per sudores criticos, somnos æquales, & urinas, easq; tum crassas, tum etiam acres & mordaces: talibus quidem vel excretis, vel in abscessum firmatis.

XLII. *Accedamus ad SINGULTVS CAVSAS, quarum sunt plurimæ, externæ atq; internæ. Nos illas ex Hippocratis aphor. 39. sect. 6. Galeni comm. 6. aphor. 13. comm. 6. aphor. 39. lib. 8. de compos. med. κ. 76π. c. 3. lib. 3. de medic. fac. parabil. c. 202. comm. 5. aphor. 1. l. 3. de loc. aff. c. 7. & comm. 1. in lib. 1. prorrh. §. 23. Avicennæ l. 3. can. fen. 13. tract. 5. c. 19. Tralliani l. 7. c. 13. Oribasii l. 4. de loc. aff. c. 83. Pauli l. 2. c. 57. Aëtii tetrab. 3. serm. 1. c. 5. hauriemus, primumq; locum externis, secundum internis tribuemus.* Causæ.

XLIII. *Censemus autem, utrasq; singultum excitare, vel gravando, vel premendo, vel vellicando, vel alterando; idq; aut manifesta, aut occulta qualitate.*

XLIV. *Inter externas causas recensetur primum ciborum copia & multitudo. Hanc causam, ait Galenus comm. 6. aphor. 13. experimur in pueris, qui frequenter singultiunt, cum pasti largius, quam conveniat: aut poti uberius, quam ventriculus tolerare queat.*

XLV. *Deinde, cibi corrupti, acres & mordaces, similiq; pharmaca, quæ acredine sua ventriculum irritant, & ad expellendum provocant. Exemplum th. 21. piperis attulimus ex Galeni comm. 6. aphor. 39. Aliud habet idem l. 8. de compos. med. κ. 76π. c. 3. de confectiōe illa aromatica, quæ diatrionpipericon nuncupatur. Multi, inquit, devorato eo singultiunt, quando vinum statim superbibunt: fateturq; hoc sibi ipsi eandem ob causam accidisse. Idem scribit aliis evenisse l. 3. de loc. aff. c. 7. & iis præsertim, quorum os ventriculi erat facilis sensus.*

XLVI. *Tertiò, medicamenta vehementer purgantia,*

ria, quæ præter hæc excitant : quas quomodo inu hant, Galenus comm. 5. aphor. 4. laconicè explicat. Ait enim, talia cathartica inaniendo siccandoq, σπασμὸν, convulsionem parere, quàm dicit peiorem esse illa, quæ fieri solet ob repletionem. Singultum autem convulsionem quandam stomachi secundum Hippocratem aphor. 39. sect. 6. esse.

XLVII. Sed rectiùs forsàn causa huius singultus partim ad ipsa purgantia, partim ad attractos ab iis humores refertur. Etenim plerq, valida cathartica sunt acria & mordacia : ut Colocynthis, Scammonium, Elleborus albus, Euphorbium, Elaterium, succus Iridis cæruleæ, Esularum, Tithymalorum & Mezerei genera: hancq, ob causam ventriculū vellicant. Humores verò allekti, biliosi maximè, æruginosi, porracei, atrabilarii, serosiq, & pituitosi salsi, os ventriculi mordent, & mordendo singultū causantur : ut colligitur ex comm. 5. Galeni aphor. 1.

XLVIII. Quartò, ea omnia, quæ ventriculum foris comprimunt : quod th. 25. exemplo costæ contortæ, & in ventriculum altiùs infixæ, declaravimus.

XLIX. Quintò, ea etiam, quæ ventriculum supra modum replent, sive esculenta sint, sive potulenta. Gravando enim singultire faciunt.

L. Sextò, quadam venenorum genera, quæ à proprietate quadam singultum cient : id quod Nicander de Rubetis, Vipera & Echino tradit.

LI. Septimò, Galenus inter causas singultus externas reponit etiam l. 3. de sympt. caus. c. 2 & l. 8. de compos. med. x. τὸ π. c. 3. ea, quæ ventriculum vel vehementer refrigerant, vel immodicè calefaciunt. Quas causas repetunt quoq, Aëtius, Oribasius, & Avicenna locis th. 42. allegatis. Frigus forsàn hoc facit, quia nervosis partibus, qualis est ventriculus, adversatur, illas vellicando ; & quia constringit ac comprimit, vacuationem & difflationem

excre-

excrementorum impediendo. Calor autem intensus id efficit, noxios humores alliciendo. Vtraque igitur qualitas causa singultus est mediata ac remota.

LII. Inter internas singultus causas recensentur primum humores acres, mordaces, & salsi, qui th. 47. recensiti. Quò etiam humores maligni, & quasi venenati, nec non similes ichores referuntur.

LIII. Secundò, tetri halitus atque vapores, qui aliunde veniunt, & ventriculum feriunt. Tales assurgere solent in peste, febrib. malignis, dysenteria, colica & iliaca passione &c.

LIV. Tertiò, vermes intestinorum, qui vel morsu, vel praeviis halitibus ventriculo molesti sunt.

LV. Quartò, inflammatio hepatis. Quae causa ab Hippocrate aphor. 58. sect. 5. ponitur. Vbi tamen Galenus in comm. monet, quòd singultus non semper inflammationi hepatis superveniat, neque quomodolibet patienti: sed necesse sit, ut inflammatio sit maxima, pessima, & fervida. In hac enim bilis gignitur, & ad principium intestinorum confluit, indeque ad ventriculum abit, ejusque orificium mordicat, ac mordicando singultum infert. Subdit autem, quosdam arbitrari, magnitudinem inflammationis ventriculum premere, ac premendo & gravando illum ad hoc symptoma compellere.

LVI. Sequuntur SIGNA DIAGNOSTICA: quibus Signa Diagnostica. quidem ad dignoscendum singultum opus non est. Is enim & agnostica. ab adstantibus auditur, & à laborantibus indicatur. Opus autem illis est ad dignoscendas causas, ut sciatur, num factus sit *ιδιοπαθητικός*, an *συμπαθητικός*.

LVII. Ortus à ciborum copia & multitudine cognoscitur ex agro, qui modum in comedendo excessit. Intellegitur quoque ex tensione ventris, gravitate stomachi, nausea, ruetu, crebra expuitione.

LVIII. *Profectus à bile deprehenditur ex oris amaro-
re, ardore & mordicatione stomachi, illisq; causis, quæ bi-
lis proventum producere solent: cujus generis sunt cibaria
calida, sicca, acria & mordacia: vina potentia & genero-
sa, quæ ingurgitata: adhuc temperamentum cholericum,
ætas juvenilis, æstatis fervor, hepatis caliditas. Cognoscitur
quoq; ex siti, vomituq; si adsit, bilioso.*

LIX. *Natus ex frigidis, crassis viscosisq; humoribus,
qui tamen bilioso rarior, innotescit ex prægresso victu, cibi
inappetentia, nausea, raritate potus, quoniam sitis non ur-
get: juvamine à rebus calidis, noxa à frigidis.*

LX. *Genitus à rebus externis, quæ narratæ in causis,
cibis, potibus, medicamentis, rebus calefacientibus & refri-
gerantibus, venenatis, &c. nobis palàm fit ab agris & ad-
stantibus.*

LXI. *Procreatus ab interno aliquo affectu, ut inflam-
matione alicujus visceris, feбри maligna, dysenteria, diar-
rhæa, colica &c. ex propriis illius indiciis apparet.*

LXII. *Idiopathicus singultus est continuus, adestq;
humorum saburra, quæ ex ructu, vomitu, odore, & sapo-
re cognoscitur. Sympatheticus autem judicatur, si conti-
nuus non sit. Illarum etiam partium affectus, à quib. cau-
sa promanat, suis ex signis elucet.*

Signa
Prognosti-
ca. LXIII. *PROGNOSTICA SIGNA de singultu apud Hip-
pocratem extant plurima. Allegabimus paucula.*

LXIV. *Ab immodica purgatione, quam ὑπερβάτης
Græci vocant, singultus, νανὸν. Aphor. 4. sect. 5. Ratio pa-
tet ex th. 47.*

LXV. *Singultus ab ileo, qui & Volvulus, & χορδαῖος,
& miserere mei vulgo nuncupatur, in quo alvi feces per os
ejiciuntur, νανὸν: aphor. 10. sect. 7. quoniam feces ubi ad
ventriculum usq; conscenderint, morsum ventriculo infe-
unt: unde singultus.*

LXVI.

LXVI. Si senibus ὑπερκαταρροαίς enormiter purgatis singultus accidat, ἐν ἀγὰθόν: aphor. 41. sect. 7. Galenus addit in comm. singultū omnibus supra modum purgatis malum esse: senibus autem & singultum, & omnia mala pejora esse propter ætatis infirmitatem.

LXVII. A vomitu singultus, & oculorum rubor, κακόν: aphor. 3. sect. 7. Fit autem singultus à vomitu duabus de causis. I. quia materia, quæ evomitur, dum transit per Ventriculi orificium, ipsum sua qualitate irritat, maxime si acris & mordax fuerit. II. quia materia radicatus extirpata non est, sed reliquæ ejus in ore ventriculi manserunt, ipsum vellicantes. Oculi autem rubent, post vomitum violentiorem, quoniam caput replet, & aliàs etiam oculis nocet. Galenus in comment. dicit ruborem oculorum signum esse inflammationis ventriculi, sed præcipuè cerebri.

LXVIII. Ἀφωρία cum singultu pessima: Galen. authore comm. 1. in l. 1. prorhet. §. 23. Querit autem, quam vocalium instrumentorum lesionem singultus in ἀφωρίᾳ h. e. vocis privatione sit secutus? Et respondet, aut copiam humorum, quæ ἀφωρίαν peperit, in os ventriculi defluxisse: aut defluxionem esse acrem, vel frigidam.

LXIX. Singultus superveniens diarrhœæ malum signum est, inquit Avicenna l. 3. fen. 16. tract. 1. cap. 2. causamq; mox subjungit, quia siccitatis est nota.

LXX. Singultus à sanguinis vel venosi, vel arteriosi effluxu immodico, est lethalis: Avicenna l. 4. can. fen. 4. tract. 2. cap. 16. Ratio est, quoniam calor, sanguis, & spiritus, necessaria animæ organa, evacuantur,

LXXI. Superest CURATIO: quæ in sanis, necessaria Curatio. non est, quia sponte desinit. In agris autem requiritur, quia interdum vehementer urget, diu durat, & vires prostermit.

LXXII. *Ante omnia autem habenda ratio est cause. Hac enim dempta, symptoma istud evanescit. Quod si tamen id magnoperè urgeat, ut agrum ob vigilias, quas inducit, ob anorexiam & inediam, quam malè affectus ventriculus gignit, ob dolores & agitationem mediî imiq; ventris, quæ in singultu solennis est, admodum debilitet, æquum est, ut illi remediis ejusmodi obviam eatur, quæ ipsum sedent, manifesto, aut abdito modo.*

LXXIII. *Quia verò causa singultus varia est & multiplex, ideòq; varia etiam præsidia postulat, quod præsci sollicitè inculcant: cum primis autem vomitoria & dejectoria, quæ vicibus repetitis usurpanda.*

LXXIV. *Quod si ergò singultus originem traxerit ab humoribus acerbis & erodentibus, tunc vel per vomitum, vel per alvum expurgandi sunt. Per vomitum, si patiens facillè vomat. Per alvum catharticiis lenioribus.*

LXXV. *Volumus autem etiam vomitoria blanda esse: qualia sunt sequentia.*

Aqua Raphani, flor. Genistæ, Nucum viridium.

Decoctum sem. Atriplicis, Raphani, Anethi, Vrticæ, Genistæ.

Hydromel, Hidrelaum.

Syrupus acetos. simpl. Oxymel simpl. Oxymel scyllit.

Oleum Amygdal. dulc. Ol. Raphanin. Ol. Nucum, vel Lini, largiter potum.

Pingua jura, & aqua tepida in bona quantitate assumpta. Vel per se sola, vel cum oleis, aquis, decoctis, syrupis jam expositis, vel etiam cum electuario diasari Fernelii hausta.

Conferunt quoque ad vomendum Gilla Theophrasti, & vitriolum alb. vomitivum Crollii.

LXXVI. *Mitiora purgantia sunt Syrupi de Rhabarb. de Cichor. cum Rhabarbar. Rosar. & violar. solut. simpl.*

simpl. de Manna, Diapersicorum : qui propinantur cum decoct. commun. lenit. decoct. cordiali & pectorali, decoct. Senæ, vel Andernaci. Adduntur el. diacathol. el. lenitiv. diacassia cum Manna. In frequenti usu quoq; sunt sacculi, qui infunduntur in vino, & continent tum ingredientia alia, tum etiam purgantia simplicia, utpote Rhabarbarum, Agaricum, folia & folliculos Senæ, cum suis corrigentibus, Cinnamomo, Spica Indica, Zinzibere, Sale gemma, Caryophyllis, sem. Anisi & Fœniculi.

LXXVII. Acredinem & mordacitatem humorum compescunt, atq; infringunt, Aquæ Endiviæ, Cichorii, Acetosæ, Acetosellæ, Violarum, Fragorum, Lactucæ, Portulacæ, Nymphææ, Seri lactis Caprini.

Syrupi Acetosæ, Acetosellæ, Violar. Fragorum, Cichorii, Portulacæ, Papaveris alb. Glycyrrhizæ, Iuiubarum, Althææ, Nymphææ, Papaverinus simplex.

Julepus Rosarum & Violarum.

Emulsiones ex Amygdal. dulc. sem. 4. frig. major. & minor. sem. Papaver. albi.

Conservæ Violar. Acetos. Acetosell. Borragin. Buglossæ Nymphææ.

Lactuca Hispan. condita. Rad. Cichorii condit.

Ptisana ex Hordeo, Passulis Corinth. Violis, Prunis dulcibus, & Glycyrrhiza parata.

His adjungi debent contemperantia alimenta ex brodiis carniū & gallinarum, pulticulis ex Amygdalis, Amylo, Hordeo, Pomis dulcibus, Passulis Corinth. Prunis dulcib. & c. confecta.

LXXVIII. Si singultus sit profectus à frigidis, crassis, lenis & glutinosis humoribus, incidendi, attenuandi, abstergendī & evacuandi sunt. Incidunt autem attenuant atq; abstergunt ex simplicibus Radices Apii, Fœniculi, Asparagi, Petroselini, Rusci, Ononidis, Helenii.

Herbæ Calaminth. Hyssopi, Pulegii, Betonica, Mammarii alb. Veronica, Cardui bened. Rosmarini.

Semina Anisi, Fœniculi, Carui, Cymini,

Ex officinalibus & arte paratis habentur.

Aquæ Petrosel. Fœnic. Anisi, Apii, Cnionidis, Hyssopi, Calaminth. Anethi, Veronica, Betonica, Card. benedicti. &c.

Syrupi de Hyssopo, de Calamintha, de Betonica, de Veronica, de Card. benedicto, è duab. & quinq. radicibus. Oxymel simpl. Oxymel compos. Oxymel scyllit. &c.

LXXIX. Si occasionem singultui præbuerunt vapores, halitus, sive flatus, carminantibus & calorificis discutienti & dissipandi sunt; quæ sunt ———

Spiritus Anisi, Fœniculi, baccarum Iuniperi, cum aquis, aut brodiis permisti.

Tragemata ex speciebus dianisi, aromat. caryophyllati, diagalanga, diacinnamomi, diacalamintha, diazinziberis &c.

Condita, ut Zinzib. chinaum & Indic. conditum, Nuxmosch. condita.

Tabulæ post pastum, tab. Anisi & Fœniculi.

Syrupus de Cinnamomo, syr. de vino Cretico.

Theriaca Androm. Mithridatium.

Vinum Hippocraticum & Malvaticum cum buccella panis tostii assumptum.

Foris fomenta humida, vel sicca admovenda sunt ex Absinth. Mentha crispa, Rosmarino, Puleg. Calamintha, Salvia, Origano, Hyssopo, Calamo aromatico, Galanga, Baccis Lauri & Iuniperi.

LXXX. Si malignitas fuerit observata, alexipharmacis & cordialibus agendum medicaminibus. Prostant autem in officinis Theriaca, Mithridat. Antidotus Matthioli, Diascorderium Fracastorii, Lapis Bezoar. Or. tabul. Bezoarica,

rica: quæ dari possunt cum Aq. Angelic. Petasit. Imperator. Card. benedict. Scorzoner. Scordii, Vincetoxic. Scabios. &c.

Sunt in iisdem etiam aquæ compositæ, ut aq. theriacalis cum vino, & cum aceto, aq. pestilentialis bezoartica.

Sunt insuper Syrupi Cardui benedicti, Scabiosa, Corticum citri, flor. Auranciorum &c.

Sunt Conservæ Card. bened. Scabiosa, Melissa, flor. Citri.

Est deniq. Pulv. rub. Pannonicus.

LXXXI. *Affectus aliarum partium, unde vitium emanavit, peculiarem curam exigunt: ut sunt febres singultuosa, inflammationes viscerum, febres maligna, dysenteria, alii.*

LXXXII. *Vermes necandi sunt: enecti expellendi. Necantur amaris, acidis, salsis, acribus remediis.*

LXXXIII. *Necantur Aquis stillatitiis Lilior. convallium, Portulacæ, Nucum immaturarum, Scordii, Rutæ, Centaur. minoris, Tanaceti, Card. benedicti, Raphani marini, Absinthii, Gentiane &c.*

Syrupis de Portulaca, Card. bened. Scordio, Absinthio, Nicotiana, Hyperico, Limonum, Berberum.

Conservis Centaur. min. Card. benedict. Scordii, Absinthii.

Theriaca Mithridat. Diascordio.

Confect semin. Santonic. Coriandr. preparati.

Pulverib. & confectionib. contra vermes in dispensatoriis Augustanor. & aliorum descriptis.

Pulvis Corallina

Condimento ex Raphani marini rasura, cum equalibus portionibus vini & aceti permista. Hoc enim valde efficax est.

LXXXIV. *Enecti expelluntur medicamentis catharticis:*

ticis: utpote Syrup. flor. Persicor. de Rhabarbaro, de Cichor. cum Rhabarb. de Agar. Diasereos Andernaci.

Tabulis Diaturb. cum Rhabarbaro.

Extracto Rhabarbari simpl. & composit.

Extract. Aloës, Tabellar. Diacitr. solut.

Pilulis de hiera cum Agar. de Aloe lota. Alſajereth, de Rhabarb. sine quib. Aggregativis, multis aliis.

Sacculis in vino infusis, quib. inclusa Absinth. Card. bened. flor. Persicor. & Centaur. min. sem. Nasturt. Coriandr. præpar. Citri, Rhabarb. Sena, Agaric. &c.

LXXXV. *Traduntur ab antiquis & neotericis scriptoribus, & præcipuè ab Avicenna, Paulo, Aëtio & Orbasio, locis th. 42. indigitatis experimenta quadam ad singultum sedandum comparata, quæ mantissa loco subicere placet.*

LXXXVI. *Vsurpantur autem diversimodè. Nam vel mastificantur, vel comeduntur, vel bibuntur, vel naribus applicantur, vel os iis colluitur, vel gargarismi in modum adhibentur, vel certis quibusdam partibus alligantur, vel ventriculo imponuntur, aut inunguntur, vel in faciem insperguntur.*

LXXXVI. *Masticantur Anethum, Anisum, Cinnamonum, Caryophylli, Zedoaria.*

Comeditur idem Anethum, & extract. Mentha.

Bibitur Anethi pulvis cum aqua propria. Celebratur etiam syrupus de Mentha.

Potui datur Ruta cum vino, aut cuminum, aut Zinziber, similiter & Castoreum.

Item & Elixir proprietatis, Aqua Cinnamomi. Offeratur manè tribus horis ante cibum radix Zinziberis viridis, & superbibatur vinum malvaticum. Iteretur aliquoties.

Huc pertinent & aq. stillatitia Linguae Cervinae, sive Phyllitidis. Theriaca

Theriaca sumpta cum decocto Salviae minoris.

Aqua vitae cum pauco Cinnamomo.

*In causa calida ad humorum acrimoniam mitigandam,
& illorum fervorem contemperandum bibitur etiam aqua frigida.*

Naribus admoventur Castoreum, Ruta, Anethum & pulvis seminum sacculo inclusus.

Os colluitur aqua frigida in causa calida.

Ex eadem etiam sunt gargarismata.

Carpo manus sinistra alligatur Cuminum lineteolo involutum. Alligatur & Castoreum.

In manibus gestantur Alyssum, Mentha, Anethum, Cuminum sylvestre.

Ventriculo imponuntur in causa calida spongiae acetorosa imbutae.

Eidem inunguntur oleum Mastichinum, Absinthii, Anethinum, Castorei, Menthae.

*Quidam etiam illi cucurbitulas affigunt, ad averte-
dam causam imbibitam.*

In faciem aegri subito & ex improvise inspergitur aqua frigida, ut laborans terreatur, & exinde spiritus una cum calore pellantur ad interiora, causaeque mali discutiatur, dissipetur, & consumatur.

LXXXVIII. Erysimachus Medicus, ut apud Platonem in Convivio legitur, tria remedia Aristophani singultienti consulebat: 1. sternutamentum ex aphor. 13. sect. 6. Sed Gal. scribit in Comm. oportere, ut singultus ortus sit à plenitudine, non ab inanitione, quem sternutatio minimè tollit. Hunc autem posteriorem singultum longè rariorem esse dicit eo, quem plenitudo & repletio introduxit. Rationem verò, cur sternutatio singultum compescat, hanc adfert, quia violento opus sit motu, ut humores singultum efficientes velut

veſte quodam concuſſi diſſentur & evacuentur : id quod ſternutatio facit. Sternutando enim, & cerebrum, & ventriculus, ob nervos ad illum derivatos vehementer concutiuntur, ac quaffantur, & ſic etiam humores, ſingultus cauſa, eliminantur. Quod ipſum etiam comm. 5. aphor. 35. nec non l. 2. de ſymptom. cauſ. c. 6. docet. Vehementiore enim concuſſu excutit ſternutatio ea, quæ partibus firmiter ſunt infixæ.

II. Spiritus cohibitionem in cauſa frigida : quoniam illius retentio calefacit non ſolum partes reſpirationi deſtinatas, ſed etiam naturalibus dicatas actionibus. Hiſce autem calefactis, flatus diſſipantur, & humores à calore abſorbentur.

III. Aquæ tepidæ potum, nimirum eo in ſinguliu, qui ab acrimonia humorum excitatus eſt. Hos enim ſua tepiditate & humiditate mitiores temperatioresq; reddit. Gale- nus aquam tepidam magna in quantitate propinat, ut vomitum moveat, & acres mordacesq; humores evacuentur.

LXXXIX. Hiſce præſidiis adjunguntur quoq; τὰ ψαρκα-
νὰ, ut ventriculi ſenſus obtundatur, minùsq; cauſam λυγ-
μοποιήτικὴν ſentiat.

XC. Suadent inſuper allegati artis Dictatores, & præ cæteris Avicenna, ut ſingultientes ad ſubitaneum terrorem, timorem, conſternationem, iram & gaudium commoveantur, eum in finem, ut calor & ſpiritus vel in-
trò pellantur, vel in omne corpus diffundantur in cauſa fla-
tulenta, aut humida, quo illa diſcutiatur, hac verò con-
ſumatur.

Forſan etiam propterea, ut ventriculus cauſa ſtimu-
lum non ita ſentiat, vi ſenſifica ob ſpiritus animalis reper-
cuſſionem aliorſum converſa.

XCI. Deniq; præcipiunt, ut, ſiquidem ager tan-
tum

tum virium habeat , validè moveatur , vociferando , cur-
rendo , equitando , aut gravia onera gestando. Hisce e-
nim motibus fit , ut calor explicetur , & materia loco suo
moveatur.



COROLLARIA.

I.

Vtrum singultus motus sit compositus, partim
naturalis, partim animalis ? Gordonius in *Me-
dicinae lilio* part. 5. c. 7. agentem tuetur. Quid
nobis videatur , edisseremus , si priùs exposueri-
mus , quid motus animalis , quid naturalis in Medicorum
scholis significet. Est autem animalis motus is , qui dici-
tur προαίρετικός , situs scil. in nostra voluntate & arbitrio, ut,
quemadmodum Galenus lib. 2. de motu musculor. c. 5. docet,
illum excitare possimus , cùm volumus , & intermittere ,
quando libuerit. Facere item illum celeriores , aut tar-
diores , crebriores , aut rariores. Talis motus est capi-
tis , oculorum , labiorum , linguae , maxillae inferioris , colli ,
thoracis , artuum superiorum & inferiorum : quoniam mus-
culis , qui voluntarii motus instrumenta sunt , peragitur ,
Naturalis autem à nostra voluntate minimè dependet ; qua-
lis est cordis , cerebri , & arteriarum. Hunc enim neq̃ co-
hibere , neq̃ excitare , neq̃ crebriorem , neq̃ rariorem , neq̃
velociorem , neq̃ tardiores pro libitu nostro efficere possu-
mus. Hoc dogmate praemisso , respondemus , singultum mo-
tum animale ac voluntarium non esse , quia pro arbitrio

nostro neq³ institui , neq³ sedari , neq³ accelerari , neque tardari , neq³ frequentior , neq³ rarior fieri potest. Ratio est, quoniam, per musculos minimè peragitur, sed à facultate ventriculi expultrice proficiscitur , quæ profligare id annititur, quod ventriculum vel gravat, vel premit, vel qualitate abdita , aut manifesta ad excretionem stimulat atq³ irritat. Est igitur motus merè naturalis.

Verùm quæri posset, cur ergo Galenus dixerit, singultum motum esse similem tussi, lib. 2. de symptom. caus. c. 1. cùm tussis motus sit animalis, eò quòd per musculos thoracem contrahentes excitetur? Respondemus, similitudinem singultus cum tussi non consistere in forma motus, quasi singultus, perinde ut tussis, per musculos fieret, hocq³ nomine animalis & voluntarius esset motus, sed quòd ab eodem principio efficiente, ipsa nimirum facultate expultrice proveniat. Nam quemadmodum tussis oritur, quando facultas ista ad excernendum laceßitur, & thoracis partes rem laceßentem sentiunt, sic etiam singultus nascitur, cùm ventriculus ab objecto sibi molesto infestatur, idq³ sentit. Tunc enim adversus illud insurgit, & vel per vomitum, vel per singultum se exonerare contendit. In utroq³ igitur motu hæc tria concurrunt. I. res aliena, quæ est molesta. II. sensus partis, cui illa inheret. III. facultas expultrix, quæ eam exturbat.

II.

An singultus fieri possit, si cibus siccus, durus, crassus, & mole major, quàm ut commodè, & facilè ad ventriculum abire queat, in œsophago hæreat?

Rasis testatur, se observasse, quòd hoc in quodam eveniret. Arbitramur, fieri quidem istud posse, sed ventriculo compatiente. Nam cùm œsophagi pars infima cum ventriculi orificio sit continua, ideò distento pressog³ œsophago in

go in consensum rapitur orificium. Consideranda igitur œsophagi partes videntur tres : summa , media , & ima. Summa subjacet laryngi asperæ arteriæ , per quam inspiramus & expiramus. Media deorsum fertur , vertebris colli, thoracis , vicinisq; partibus connexa. Ima orificio ventriculi inseritur. Summa in faucibus cibum excipit. Media deducit. Ima in ventriculum deponit. Quodsi summa , quæ laryngi substrata , à crassiore grandioreque cibi bolo distendatur , & laryngem comprimat , suffocatio sequitur. Si in ima hoc eveniat , singultus excitatur. Si in media, neutrum contingit : quoniam ab utraque parte , larynge & ventriculo , longius abest.

III.

An ventriculus in singultu rectè contrahi dicatur , cum contractio sit musculorum actio , ventriculus autem in eorum albo neutiquam contineatur ? Respondetur , non omnem contractionem per musculos fieri : aliàs cor contrahi non posset , cum musculus propriè non sit , tametsi ab authore libelli de corde *nałaxensinōs* musculus nomine-
tur. Neque contrahere se posset cerebrum in sternutatione , & convulsionibus epilepticorum : neque intestina in dejectione facum alvi : neque vesica in redditione urinae : neque uterus in emissionem fœtus : quia partes istæ musculis carent. Sed contractiones etiã peragi possunt , vel per partium fibras : vel per virtutem facultatis expultricis , iis in partibus , quæ fibris sunt destitutæ , in quarum numero cerebrum est.

IV.

Vtrum singultus fiat , cum inspiramus , an cum expiramus ? Posterius placet : quia in singultu sonus quidam

D 3

dam auditur. At is in contractionē & expiratione sentitur. Potest autem oriri ab aëre, vel ab halitu, à pulmonibus, aut ventriculo emissio. A pulmonibus in contractionē thoracis, & consequenter in expiratione: in qua etiam vox à nobis editur. Emittitur autem aër per rimulam laryngis, qua nec prorsus tunc temporis, cum vox editur, clausa est, ut esse solet in spiritus cohibitione: nec planè aperta, ut in nobis tacentibus, aut liberè spirantibus, aut in ἐκκυσίῃ, exufflatione: sed medio modo se habet: aliquo scil. modo clausa, aliquo aperta, quo aër eò elevatus quasi conglobatus & condensatus per angustiam illam cum quodam conatu exire cogatur. Quod dum fit, sonum efficit inarticulatum quidem, sed qui postea in ore ejusque particulis articulatur. A ventriculo verò, halitu ab ejus cavitate, cum se contrahit ventriculus, sursum impulsio, & vi quadam per angustam portam, qua in summitate est œsophagi, expresso.

V.

Quamobrem capite vehementer percusso, & cerebro, aut meningibus duntaxat illius sauciatis, aliquando singultus excitetur? Causa est mirabilis cerebri cum ventriculi orificio consensus: & quidem per nervos illos stomachicos insignes & multos, quos sexta nervorum conjunctio cerebri illi suppeditavit. Nam & vomitus quandoque biliosus vulneribus cerebri supervenire solet, authore Hippocrate aphor. 50. sect. 6, idque propter eandem causam: quoniam bilis humor est tenuis, & ob id facile mobilis: orificium verò ventriculi exquisitè & accuratè sentit, adeò ut irritatum vomitio promptè sequatur.

VI.

Num singultus etiam πάλος sit pulmonum, cum
videa-

videamus, in singultientibus thoracem & pulmones unà cum ventriculo moveri & contrahi? *Moventur quidem unà, sed ventriculus per se & primariò, thorax autem & pulmones solum per consensum, & secundariò: sicut eadem partes etiam in sternutatione, tussi, & vomitu moveri solent.*

VII.

Cur ambulatio super pavimento frigido pedibus denudatis, aut natatio in aqua frigida singultum quandoque pariat? *Causa videtur duplex dari posse. I. quoniam ventriculus facilè compatitur, præsertim pedibus refrigeratis. Nam ob membranosam & nervosam substantiam ventriculus, qui & ipse tali substantia præditus est, rapitur in consensum. Et non ventriculus solum, sed & cauda illius, h. e. intestina. Vnde & natantes in aqua frigida, & nudis pedibus in locis nivosis ambulantes, aut super lapidibus frigidis incedentes, in alvi profluvium cadere comperimus. II. quia frigida, sicuti omnibus partibus frigidis, ut Hippocrates loquitur aphor. 18. & 22. sect. 5. sunt inimica, ita & ventriculo. Faciunt ergò, ut ventriculus ea aversetur: malè concoquat, & ejusmodi generet materiam, quæ tùm incommoda alia, tùm singultum quoque accersat.*

F I N I S.

Præstantissimo

*Et doctissimo Domino Respondenti
salut. pl.*

Est dictum *Seneca*, quòd quæ sunt commoda, quæque
Optatam possunt ferre salutis opem,
Sint nobis agitanda diu, versandaq; sæpè,
Nota ut sint penitus, sintq; parata simul.
Ergò morborum quia contemplatio crebra
In se permultum commoditatis habet,
Scilicet ut *citò, jucundè, tutòq;* mederi
Ægrotis liceat, ceu Medicina monet.
Idcirco benè, *Mappe*, facis, suavissime Amice,
Et rectè studiis consulis ipse tuis.
Morborum species quòd ad unguem nôsse labores,
Seu nox atra adsit, lucida sive dies.
Atque hoc *Singultu* studeas ostendere cunctis,
De quo publicitùs differuisse cupis.
Pergè bonis avibus, nec non felicibus ausis
Currere in hoc stadio: namque per ampla tibi
Gloria nascetur, toto quam pectore ab illo
Opto tibi, solus qui dare cuncta potest.

MELCHIOR SEBIZIUS D.